

10 Hiaⁿtī chímōe, góa ê sim pekchhiat teh ñgbāng, koh putsî tùi SiōngChú teh kîkiú ê, tòh sī góa ê tôngpau Isulael lāng ē tàng titkiù. ² Góa ē tàng chèngbēng, in tùi SiōngChú khaksit sī chin jiátsim, chóng sī, in ê jiátsim pēng m̄ sī kinkì chèngkhak ê liáukái. ³ Inūi in bô bēngpék SiōngChú ê konggī, koh siūⁿ beh kiànlip kakī ê konggī, kiátkó soah bô sūnhók SiōngChú ê konggī. ⁴ Kísit, Kitok sī lúthoat ê kiatsok, inūi I hō sōu sìn ê lāng lóng tit tiòh chhenggī.

Choân Jînlūi ê Chínkiù

⁵ Koanhē tùi lúthoat tit tiòh ê gī, Mōse bat áne siá kóng: **Chunsiú lúthoat ê lāng khò lúthoat lái oáh.** ²⁹ ⁶ M̄ koh, koanhē “in sìn chheng gī”, kengtián ū áne kóng, “Lí m̄ thang simlāi siūⁿ kóng: **Siáⁿlāng beh beh chiūⁿ thiⁿ?** ³⁰ (ìsù tòh sī, beh khì chhōa Kitok lòhlái.) ⁷ Mā m̄ thang siūⁿ kóng: **Siáⁿlāng ē lòhkhì imhú?** ³¹ (ìsù tòh sī, ē khì chhōa Kitok tùi sílāng tiong khí lái.)” ⁸ Chiahê òe tàuté sī siáⁿmih ìsù? ìsù tòh sī:

SiōngChú ê òe tòh tī lí ê sinpiⁿ,

tī lí ê chhùi nih, tī lí ê simlāi. ³²

Che tòh sī goán só thoân ê koanhē “sìn” ê tōlí. ⁹ Lí nā ēng chhùi kòpék Iésu sī Chú, simlāi mā sionsìn SiōngChú hō I tùi sílāng tiong kohoáh, áne, lí tòh ē titkiù. ¹⁰ Inūi lāng nā sim sìn tòh ē tit tiòh chhenggī, chhùi nā kongkhài soanjīn, tòh ē titkiù. ¹¹ Kengtián ū áne kóng: **Sìn I ê lāng lóng bē tú tiòh sitbōng.** ³³ ¹² Iúthài lāng kah gōapang lāng lóng bô chhapiát, inūi in ū káng chítê Chú, tòh sī bānbîn ê SiōngChú, I ē tōatōa sù hok hō sōu kiúkiò I ê lāng. ¹³ Inūi kengtián ū kichài:

²⁹ LBK 18:5

³⁰ SBK 30:12

³¹ SBK 30:13

³² SBK 30:14

³³ ISI 28:16

10 兄弟姊妹，我 ê 心迫切 teh ñg 望，koh 不時對上主 teh 祈求 ê，tòh 是我 ê 同胞以色列人 ē tàng 得救。 ² 我 ē tàng 證明，in 對上主確實是真熱心，總是，in ê 熱心並 m̄ 是根據正確 ê 了解。 ³ 因為 in 無明白上主 ê 公義，koh 想 beh 建立 kakī ê 公義，結果 soah 無順服上主 ê 公義。 ⁴ 其實，基督是律法 ê 結束，因為祂 hō 所有信 ê 人 lóng 得 tiòh 稱義。

全人類 ê 拯救

⁵ 關係 tùi 律法得 tiòh ê 義，摩西 bat áne 寫講：遵守律法 ê 人靠律法來活。 ²⁹ M̄ koh，關係「因信稱義」，經典有 áne 講：你 m̄ thang 心內想講：啥人 beh beh chiūⁿ 天？ ³⁰ (意思 tòh 是，beh 去 chhōa 基督落來) ⁷ Mā m̄ thang 想講：啥人 ē 落去陰府？ ³¹ (意思 tòh 是，ē 去 chhōa 基督 tùi 死人中起來)”。 ⁸ Chiahê 話到底是啥物意思？意思 tòh 是：

上主 ê 話 tòh tī 你 ê 身邊，

tī 你 ê 嘴裡，tī 你 ê 心內。 ³²

這 tòh 是阮所傳 ê 關係「信」 ê 道理。 ⁹ 你若用嘴告白耶穌是主，心內 mā 相信上主 hō 祂 tùi 死人中 koh 活，áne，你 tòh ē 得救。 ¹⁰ 因為人若心信 tòh ē 得 tiòh 稱義，嘴若公開宣認，tòh ē 得救。 ¹¹ 經典有 áne 講：信祂 ê 人 lóng bē tú tiòh 失望。 ³³ ¹² 猶太人 kah 外邦人 lóng 無差別，因為 in 有仝一个主，tòh 是萬民 ê 上主，祂 ē 大大賜福 hō 所有求叫祂 ê 人。 ¹³ 因為經典有記載：

²⁹ 利 18:5

³⁰ 申 30:12

³¹ 申 30:13

³² 申 30:14

³³ 賽 28:16

Sóu kiúkiò Chú ê miá ê lāng lóng ē titkiù.³⁴

14 Chóng sī, nā bô lāng sìn, ná ē kiúkiò l? Nā bô lāng thiaⁿ tiòh, ná ē sìn l? Nā bô lāng thoaniông, ná ē thiaⁿ tiòh? 15 Nā bô lāng siū chhephài, ná ē khi thoaniông? Chiàu kengtián kichài: **Thoân pò hokim ê lāng, in ê khajiah sī gōanh'á súi!**³⁵ 16 Chóng sī, pēng m̄ sī sóu ê lāng lóng sūnhók chitê hokim. Isáiah bat kóng: **Chú ah, siáⁿ lāng ũ sionsìn goán só thoân ê sinsi!**³⁶ 17 Sói, sìn sī tùi thiaⁿ khaisí, thiaⁿ sī chí thiaⁿ Kitok ê òe.

18 M̄ koh góa beh m̄ng: In kám chinchiàⁿ lóng m̄ bat thiaⁿ tiòh? Tongjiân bat. Inūi kengtián ánne kichài:

In ê siaⁿim thoân kàu choân sèkài,

in ê òe thoân kàu thiⁿpiⁿ háikak.³⁷

19 Góa beh koh m̄ng: Isulael lāng kám chinchiàⁿ m̄ chai? Môse cháchêng tòh ũ kóng kòe:

Góa beh ēng m̄ sī góa ê chúbîn ê lāng lâi kek khí lín ê chittò,

ēng gūgōng ê chúbîn lâi kek khí lín ê siūkhi.³⁸

20 Āu lâi, Isáiah mā hótáⁿ kóng:

Bô chhōe Góa ê, Góa hō in chhōe tiòh;

bô kiū Góa ê, Góa tùi in hiánhiān.³⁹

21 M̄ koh, kóng kàu Isulael lāng, Isáiah kóng:

Góa kui jít chhunchhut siang chiú teh thèngāu m̄ sūnhók koh pōegék ê chúbîn.⁴⁰

所有求叫主 ê 名 ê 人, lóng ē 得救。³⁴

14 總是, 若無人信, ná ē 求叫祂? 若無人聽 tiòh, ná ē 信祂? 若無人傳揚, ná ē 聽 tiòh? 15 若無人受差派, ná ē 去傳揚? 照經典記載: 傳報福音 ê 人, in ê 腳跡是 gōanh'á súi!³⁵ 16 總是, 並 m̄ 是所有 ê 人 lóng 順服 chitê 福音。以賽亞 bat 講: 主 ah, 啥人有相信阮所傳 ê 信息?³⁶ 17 所以, 信是 tùi 聽開始, 聽是指聽基督 ê 話。

18 M̄ koh 我 beh 問: In kám 真正 lóng m̄ bat 聽 tiòh? 當然 bat。因為經典 ánne 記載:

In ê 聲音傳到全世界,

in ê 話傳到天邊海角。³⁷

19 我 beh koh 問: 以色列人 kám 真正 m̄ 知? 摩西早前 tòh 有講過:

我 beh 用 m̄ 是我 ê 子民 ê 人來激起 lín ê 嫉妒,

用愚戇 ê 子民來激起 lín ê 受氣。³⁸

20 後來, 以賽亞 mā 好膽講:

無 chhōe 我 ê, 我 hō in chhōe tiòh;

無求我 ê, 我對 in 顯現。³⁹

21 M̄ koh, 講到以色列人, 以賽亞講:

我 kui 日伸出雙手 teh thèng 候 m̄ 順服 koh 悖逆 ê 子民。⁴⁰

³⁴ IES 2:32

³⁵ ISI 52:7; NHS 1:15

³⁶ ISI 53:1

³⁷ SPh 19:4

³⁸ SBK 32:21

³⁹ ISI 65:1

⁴⁰ ISI 65:2

³⁴ 珥 2:32

³⁵ 賽 52:7; 鴻 1:15

³⁶ 賽 53:1

³⁷ 詩 19:4

³⁸ 申 32:21

³⁹ 賽 65:1

⁴⁰ 賽 65:2